

Pa ruman i zùster

Djabièrnè, 1 di òktober 1993

E akto di awe tardi
ta proba
ku tur loke bo a sembra
na bondat i sabiduria
nos ke kosechá
i sigui konservá.

Bo a duna nos ehèmpel
kon sa stima próhimo.
Bo a mostra nos kaminda
den bon tempu i den horkan.
Meimei di ola haltu
manera faro bo a manda klaridat
pa lusa sintí
di grandi i chikí,
inspirando fe
i fortaleza.

Ta kon ta hasi lubidábo;
ta ki dia lo stòp di yorabo?

Gratitut ta brota
fo'i nos kurason
pa tantu tesoro
ku b'a laga atras pa nos.
Nos lo sa di kuida nan
i sigui pasa nan
pa esnan ku bin despues.

Lo bo biba den bo obranan,
pasobra bo a sa
di duna di bo mes.

Rekuerdo di bo amor
ta nos konsuelo.

Drumi dushi awor.
Nos lo sigui obra
den bo nòmber.

Te na fin di dianan
lo keda kòrdabo
Tur semper
nos lo sigui stimabo,
stimabo,
stimabo!

Nydia Ecury